

四庫全書

集部

欽定四庫全書

沈下賢集卷七

唐 沈亞之 撰

書

上冢官書

亞之伏念傑木之生大長越倫足谷肩山而大谷不足  
以業其根長霓不足以帷其華天之所借其體若此豈  
不使皆獲其所安而轉乎用及其未偶也徒見摧雪枯  
霜蒙烟老雲而已夫尋常之材也幹不丈而枝不尺而

葉縱其根不饒蹠土之膚生不十年各獲斤斧之制以  
就用何者受乎庶氣故易長於極成為衆用故易售於  
工其在松栢扶榮意自得仰視傑木不見其末相與笑  
其凡枿而無用及一旦遭遇得升賢工之所思採而飾  
之跨於楚而百棟賴負若是脩枝巨幹未易自致也賢  
士良匠未易能容也今閭下抱多能之強德動與智諧  
可謂遭時也負難載重橫於所安可謂得任也如能察  
出類之材異日處之然後次衆材備於百當如此則賢

工之名可以自有古者賢士之居位也沐垢不終湯充  
饑不竟飯中輟而起畏日不足是皆採訪於衆能思致  
其爵養良士之道也今則不然為公卿大臣者必嚴居  
深視以自重養其所進者唯柔氣緩言瞽視而巧諛然  
後謂之厚德故以多識為誣博知為狂遷善為流斷節  
為詐是皆斥而莫得稱也及一日操尺墨樞物機茫乎  
不知其所從使左右庸胥因得侮而役之彼非不欲自  
勝也蓋事業之所報固然今西戎邀嫁移兵寇邊仍歲

不已山東盜卒殺辱首吏未聞其歸誠可嗟也即如主  
上求其往而為理者閭下度之公卿大臣而誰擇乎亞  
之誠不肖也七歲再官不逾九品之列陶心研慮謨古  
臣知輔之所以為化至於樂能慕哲亡其私而不回此  
則得之於性矣酌巖賢旅聖之所以立賢至於書得失  
備理亂敘往紀來此則得之於文矣學名將霸師之所  
以整暴亂至於奮旅陣師會百變之狀離如驚鳥合如  
凝雲此則得之於師矣是三者皆業於根然後緒其末

非無所望也亦思願為一從材戴宏傑之梁立巨礎之上顧世之持斧之士安足以摹哉亞之聞戎鏡包陽當日而矚之則能延燧興火處陰而視之何異一規之幽銅耶而誰寤者夫氣應則生亞之亦蒙矚於光下以發所抱書詞多鄙又不盡志忤觸清嚴罪無所逭謹再拜

上李諫議書

月日將仕郎守祕書省正字沈亞之再拜貢書諫議閣下亞之常有混類之悲不能自置其拙也甚矣故祥禽

之類凡羽而凡羽混之非獨混之而已亦且掩其芳而奪其美何則善寡而凡多故也況世俗之耳幾能於此而別白之者寒暑易轉是皆非金石安能自永於時哉一失其顧以為類混則終從風雨而老矣可不痛之輒假所喻願賜終說幸甚楚王之鼎食十有餘年而王體不肥左右者懼王曰膳者不能味吾之鼎也國人亦曰膳者不能味王之鼎也更逐膳者凡十輩益不味王恥乃令國中曰有能使吾鼎之味調和以安吾體者寡人

爵之三公楚里之處士賢聞之應令而起者老屬袖而  
送之曰往矣即鼎也然王曰仰味於君君何以塞之對  
曰王必以鼎授我我力甚優夫治鼎之職約水燥薪爨  
火以觀文武之用而已其輳味則有椒桂梅醢鹽醢之  
品在吾總衆力而調於心此其功也王之體不肥何待  
楚老曰斯固也夫真偽雜鬻循戶而啼祈其售者偽得  
十九焉是椒桂之質類而馨辛不為也梅醢之質類而  
苦酸不為也鹽醢之質類而醴鹹不為也皆具而不為



滋一旦集而會之鼎則必虛空矣君焉能總是之力以成於王耶前膳之所以得逐者由庶品之任非其任歟然則君之明足以察偽惑君之智足以區物情誠能儲其真蓄其當以給其用則從之辛齎之才醯醢之具必越海逾陸而趨君之旨矣斯百代之準也豈但肥楚王之體然今閣下既以游泳道德蓄儲助味之具必有素也然紛紛之真偽而清悟能不勞乎小子誠不足奉應對不得謁見久矣幸因從左右者召稍延於前獲進所

語幸甚伏惟降察不忽謹再拜

與薛浙東書

再拜後還坐賓舍中有小吏突如其來其語曰帛十匹  
吏置帛書於亞之前曰閭下所以貺客也其敬之誠則  
厚矣然有所未滿者敢為閭下道之夫虬能興水濟物  
故佐天如臣草木仰其澤苗方秀而望其誠有乏一日  
之雨而不及其實者則仰告斯臣以求得一日足矣若  
纔潤於枯槁則已且猶將困之今亞之往復道路三千

餘里顥顥之誠於苗之旱甚矣而千鍾之祿於水之用又大焉亦何惜一日之澤而不給其涸哉亞之狂愚當其困涸不知所為而復枯苗仰澤之說再敢煩告且閭下寧能不憐之亞之再拜

上壽州李大夫書

十一年秋作

昔者燕昭以千金市駿骨而百代稱之非直朽骨之可貴也意必在將來之良而已矣今亞之仰閭下之風而進於前恭聞閭下又不以朽鈍而顧之寧鄙人之宜顧

也其名得無將來乎是鄙人之價冒千金也幸甚幸甚  
今有傍徨之誠敢露肝膽伏惟聽察之亞之前應貢在  
京師而長幼骨肉萍居於吳無咫尺地之居以自託其  
食給旦營其晝晝營其暮如是凡三黜禮部得黜輒歸  
自二月至十一月晨馳暮走使僕馬不以恙即且碌碌  
如有一日霜露得欺氣體失理則一室向門之心無望  
矣今忘辛勤之榮扶挈長幼丐食而西雖已及埆口然  
猶困其所儲不能自給但涕泣語空無有所仰又度天

下王公希可以此言告者乃閣下耳伏惟分一日之澤以濡之無使亞之復為朽骨所笑謹再拜

與福州使主徐中丞第一書

九月十日都團練副使沈亞之謹再拜狀所願陳于閣下某伏念從古以來懷其所為抱其所用者非知己之進無能自揚也自咎繇之蒙舉顏回七十子之蒙范叔之蒙鮑叔之推至於今知己之功相嗣而不絕非有文字之紀其功雖如前數士而後代無聞也可不惜諸往

者某始得以文謁閣下於吳之嘉興明日權幼公謂某  
閣下言吾見古史者亞之也其後涉於仕路困則遭恩  
其知如此且以閣下居為世之端表故衆影依之言為  
世之典謨故衆聽傾之其重如此使一遊其門則天付  
以幸也而況知而推之哉提而用之哉然亦懼不申於  
文字而後代莫覩是以前者敢以先人所業之書上干  
清鑒求其筆為之光以揚於幽故而為後代寵奉獻之  
日惕怍咽然不能周露誠以黷矣伏願憐其繼志之心

使輝華裔著於百代雖大寵何以加於此焉伏惟俯賜終筆書辭再陳無任惕汗謹再拜

第二書

二月二十八日都團練副使沈亞之拜書復獻大使中丞閣下亞之昨與二三子同途晨問起居指教所謂薄疾未除將欲有請草奏具示始則卒然愕窒不知詞對及退舍伏念閣下之所苦者惟中年之士十九而有之未嘗聞以此而去告閣下惟不為出入宴遊耳其餘決

教益理膳息無減況方在強茂之時徒以小恙暫留膚  
中乃欲為告以自遂豈當宜也且今時仕俗守榮路者  
雖已朽老支扶昏怵矣然則固其所居惟恐有損如此  
者亦八九而閤下瞭然自悟所向若此得無獨清之累  
猜疾於彼人之胷中哉閤下骨肉交姻如有遠萬里者  
即聞是請寧知其退讓也必且疑驚隱慮莫能自浣設  
使憂能侵人間下何以解也亞之見識孱淺無足以奉  
請事今極慮深陳於前誠願得於中庸使人無加口語



也非敢憑緣取領厚祿而終斯說伏惟稍變高明之銳以周慮之冒陳端白何任恐懼伏惟憐之

### 第三書

二月十一日都團練副使沈亞之拜書遣獻中丞閣下昨日候吏自外來急告以救至亞之誠前後左右不得常步及下馬就次揖謁先聖獨張侍御不領祇言哮呼詬此梓拽導將移罵侵怒俚言攻凌不容須臾之間以黨界證攘掉呀騰如欲見食自羣官衆將至於聚立者

咸聞見其麗聲奮態園來驚視誠以亞之樗鉛之材處  
不當任可逃遭此衆辱宜矣然誠恐積暴不除異日酒  
場恃醉率肆所為又為侵作誣言飛入清聽以是寒心  
自悲不能無患亞之幸蒙過意提在賓階雖無分銖之  
能以事萬一然誓將鞭勵孱謹以効終身伏願哀其端  
拙察以無辜稍借光明使各得分限免其侵迫過此之  
虞餘何敢請伏惟加察幸甚幸甚謹再拜

與李給事薦士書

十年春作

日月新及第進士沈亞之謹拜稽首給事閣下亞之幼學見其往記說曾參閔子騫之孝至於跬步不忘雖騷幼亦能蹴然內慕自是常思其人有能跂曾參閔子騫之行者即往傳其名於親戚朋友卿大夫間使其聲不減昔者五年亞之以進士入貢至京師與其等清河張宗顏比居嘗與往來言始愛其人無遊詞至春宗顏去還家久聞其親喪又明年亞之東歸至洛聞洛人稱宗顏之孝曰宗顏貧無以事喪乃與其兄東下至汴出操

契書奴裝自賣聞者皆慟感流涕然盈月不得售汴帥  
聞之持百緡使弔勞歸之盡發其先故羈柙歸葬於所  
是歲亞之至彭城日話其事彭城人曰此吾里之客子  
也八九歲時喪私親貧不能奉飯含迺繫木為車與其  
兄自輓而送吾里謠之曰拖車郎是今曾閔之行難而  
里閭盡熟亞之竊痛賢公卿未得稱其如此伏惟閭下  
於異行尤能銳樂故亞之敢以宗顏之事為請伏惟訪  
察之幸不默默已也

沈下賢集卷七

欽定四庫全書

沈下賢集卷八

唐 沈亞之 撰

書

與潞鄜州書

六年夏作

日月沈亞之再拜稽首言大夫閣下亞之昨去長安時  
歷別於所知親門所知親友謂亞之曰安所適安所為  
亞之對曰適鄜將假貸於諸侯門所知親友賀亞之曰  
鄜有長賢大夫也喜文學仁義之道故其所為文學仁

義之道忻忻焉走其門者日有之亞之納喜於心充充  
焉捶馬走僕忘其勞失其怠望閣下之境日近日喜及  
至之也且觀將謁之禮於其門乃見納客之官奔奔而  
入促促而出言不及吐道不及陳退居三日不知所為  
乃復聽閣下採取賓士之道高下之等則曰某自某方  
來以某執事書為之輕重書之多者館善宇飽善味書  
之次者又次之其有有無因而至者雖辯智過人猶以  
為狂即與偶然之輩微幸之徒退栖陋室與百姓雜處

飢惡味且走來閤下之門者亦不獨盡窮餓無依而來求粟帛於閤下亦有抱其智懷其才聞閤下好賢而來求臧否於閤下而望其推引之濟耳今一貫而禮一類而惠賢愚顛倒而又以書不書而為之輕重竊恐天下之士其來閤下之門者皆相爭齎書為糧受閤下之惠者不口閤下之惠而皆曰某官之書禮我也何有愧於閤下不唯不愧而已亦有憤激於衷而終怨怒者竊恐閤下勞費以取無益亞亞之之愚獨為閤下惜伏願閤下



稍精接士之道使賢愚明白閣下能知此則四方之士聞之皆謂閣下不恡已之不至而求其方直如此今亞之冒旌戟之嚴敢言進於閣下亦希知言之士聞知亞之不苟曲於閣下而存其直如此戰戰無任亞之再拜

與潞州盧留後書

八年夏作

中丞閣下法者古王一其度於天下蓋欲必信於人耳非執事之臣能得專喜怒以自弄今或奉之未如其意何哉迺十四日亞之晨出南府門見一人衣縞不帶乘

捷馬北馳健僕呵道衆僕皆左右馬分走甚嚴亞之意  
謂執事有服者即止馬匿道下既去私曰執事寧不帶  
耶不則又何呵也問其僕曰是方士李元戢者繫盜他  
郡焉亞之曰既繫何為縱而遯乎僕曰彼言能化黃金  
反童齒今一郡大惑下自豪吏盡欲德之故馳過其家  
旦暮不暇亞之因仰而呼俯而揖曰是能化黃金反童  
齒焉凡執左道亂正者在殺不以赦今其人且繫尚能  
惑設冠帶自儀而孰不陷前日信州刺史以夕祀黃老

不當理官臣譖之得罪幾夷誠可寒心今閣下獨不省  
悟亞之雖不肖亦知為閣下畏伏惟亟誠獄吏使因手  
足之繫與常死罪者等無令出入自便不然法為吏侮  
而閣下安所任主哉幸留意焉亞之再拜

與同州試官書

今年秋亞之求貢於郡以文求知已於郡之執事凡三  
易郡失其知輒去其友相率而笑之亞之為之語曰里  
人有良金鬻於市而里之豪亦鬻焉俱將售於衡者豪

人金雖精里人出其左衡人畏豪奪其價而先豪里人懷而去明日之他市而衡之值復不同又懷去又明日之他又然歸而聚黨與謀曰聞某市有衡人不欺一市之人謂之直遂往與羣金角俱歷火昇衡市人曰雖然願先豪衡人曰是精麗在目輕重在衡衡目可欺乎市人慙而退其直果然今亞之之負詞來於執事其望亦同於直者也伏惟孰察無忽亞之再拜

與京兆試官書

七年冬作

孔子之徒三千而言升堂者十輩然皆不能周其德故各以其所長出人者稱之名之曰四科百世之下皆言孔子聖是知無全能者也今亞之雖不肖其著之文亦思有繼於言而得名光裔裔不滅於後由是旨春秋法太史雖未得陳其筆於君臣廢興之際如有義烈端節之事善惡無所回雖日受摧辱然其志不死亦將俟能為孔子之心者拔之是以晝夜增矣時亦有人勉亞之於進士科言得祿位大可以養上飽下去年始來京師

與羣士皆進而賦以八詠琢雕綺言與聲病亞之習未  
孰而又以文不合於禮部先黜去今年復來聞執事主  
選京兆長安中賢士皆賀亞之曰某執事斯謂明矣其  
取舍必以目辨耳察亞之曰微亞之以八韻為畏對曰  
不然夫良工為廈而選材者不以桷廢棟不責能此而  
否彼又曰無求備於一人此聖人採取之至言也亞之  
文已貢矣執事其服孔子之心有素如其取舍之際亦  
能留意乎亞之再拜

答馮陶書

馮生足下前辱書時會鄙人將有適方事役在焉今則足下又赴省於東故弟書久不遑答有負懇款無以自露然則書辭所屬寧鄙人宜當托是乎乃敢自酌以揆其意惟智府寤之樂府唱為歌十年聲流邯鄲下而魏歌者往請之曰聞古之韓娥其歌也能易哀樂變林籟則有是也何自而及是乎今子能揚韻激妙感物態矣而人投聲請價者宜以遂之必且語我使聞聽於衆耳

以得售進入為王左右之娛對曰若韓娥之歌韻合於  
氣聲合於情是故草木之於地也氣為之君五腑之居  
人也情為之長草木之生其根處瘠則其表訥處潤則  
其表昌瘠之訥潤之昌不過草木及其氣之作也為溫  
陽則萬族舒為晦寒則衆色雜瘁五腑伏五行設如金  
困於內則肺亢應於外而嚙厭極則反之木極於內則  
肝急應於外而視亂困則反之困而厭極而亂不過一  
發於內一應於外而已及情之作也為喜適則百竅走



而會之怡為悲愁則六氣集而赴之慘是皆不得自任也韓娥之得也在此馭二情以攻之故能易哀樂岐二氣以襲物則能變林籟其神至矣亦尚未聞飫寵賞於當時者何也所感者智人也草木仰天性智人不混於累夫衆庶之目怫於視世俗之耳離於聽故擊敝缶貫鼠革聚觀於市促促之歌巴聲夷辭唱一而和百贊之者千萬人南風之弦雲和之瑟曠世莫用烏能自唱其德於聲音雖韓娥之妙欲誰繼者今足下將行者古道

也將操者至聲也鄙人方困世之厭斥安足以使之聞  
聽於衆耳發嘉譽於此日乎畏辱雅向願悉所識幸甚  
幸甚

答李生書

亞之白辱書覽所措令僕人持書致安南守使從雅旨  
以契所欲意者謂僕人居峻勢能可樞其意

一云謂僕  
職在軍副

其力可驅  
彼之情

易如瞬眴夫何妄悞容易而不見知其不能

如此哉且安南守其志未佷自齊從事已下咸以公籍

督稽歷受訛侮繼章傍凌彼恃門矜老無所加責前日  
韋同舍亦然顧亞之孱畏靜常遭尤况又掌刑書累  
以法操其吏彼無路而露忿於僕人耳今來書指教欲  
使有為是執仇而赴於敵也何能致其願乎幸終悉省  
不宣亞之再拜

上九江鄭使君書

郢崖謫吏敬對所詰引言為書致於九江守鄭君閣下  
詰之既深焉得默默已也固折委謹之於章遂用悉陳

惟聽之國朝天后之時使四裔達威德之令皆儒臣自  
喬知之陳子昂受命通西北兩塞封玉門闕戎虜遁避  
而無酬勞之命斯蓋大時之有體臣之當理也然喬死  
於讒陳死於枉皆由武三思嫉怒于一時之情致力尅  
害一則奪其伎妾以加憾一則疑其擯排以為累陰令  
桑梓之宰拉辱之皆死於不命嗟乎嗟乎自是之後臨  
戎觀危酌逸勞之狀為使者而儒臣莫與矣前年天子  
以兩河逐叛之兵連歲不解負輓之輸而不造廩庫皆

從便道為戰士衣食之給於兩河之間歲尚賑朝輦之下執笏常謁請罷所討者十八九獨諫大夫自以為習知叛臣之情日就窘請得往導愍痛以歸之既可所奏即請以亞之為副又以為古者單車為使有功則為戎臣輕害之遂於行請兵以自柄詔書仍以便宜從事又詔邯鄲鉅鹿兵各以百騎與俱蓋欲重擊鑿之柄也及過平原郡城而有常山卒分居之諫大夫因令亞之為書檄之書成亞之題帛引弓射書於常山帥帥得書以期

請降滄海之人聞之降者日百有餘輩及滄海叩欵與符印偕至即請以城歸使者是日往受城亞之復引前驅騎為先至滄海同捷與其徒繫頸者服衰不帶伏軍門之左委命於使執事於是諫大夫遣河南將石稅部獻闕下稅夜殺同捷於平昌亞之分道馳還以報事道中不得乘乃乘羸驅馳至貝魏之門守長皆為艱日昃不得食因中病於廣武之間歷再旬而謫書降即奔上所委今閭下罪諫大夫以為狃急忘體冒危取禍習傳

不察其端本附言和唱敢避忌應對哉昔者酈生馮軾  
下齊城七十韓信叛而烹之在前代且爾況今持兵連  
營淹歲經時既費且敗萬無以自塞之際而使臣幸命  
詔御解羈裂網之恩啟萬死重生之路曝鰓就鼎之枯  
彼不思於降復何歸矣今習詩書步規矩而進於是者  
因未嘗習武事況親於戰鬥之間耶必多武臣之言以  
為信何者重己之不李祐避能而誠邁越之談也或亦  
有詰亞之曰李祐避壁攻平原城城危且急尚不聞有

效且使臣居間曾不逾月而云城降者何端亞之應之  
曰獨不見童子之情乎夫童子師與終身之益何惡而  
不附乳母蠕蠕之常恩而扶戀肆喜氣微意迫則毅容  
之難洽而告訴之言在前也是則向使之卒披堅甲持  
銳鋒以相攻差剛決於敵者不瞬而殞形喪魄矣有如  
使臣之煦諭明白寧有忘生趨死之渝乎此解拆之言  
誠不當為閣下說說亦不能降聽以委書之丁寧者盖  
欲流之於世以俟通方之士次第于所悞耳梗概之錄



不文於詞亞之敬再拜

答馮兄書

降書誨慰滓滯之情稍以揚矣昨日奉書應對之日操  
意張謀唯恐不速刻文勵語唯恐不工思欲不肩於俗  
以為世之大寵及遭不錄退舍自念夫若是也非窮心  
於此安能堅然而顧之雖窮心極思而風水之力所排  
者又安能固之於此固之於彼非吾兄韓兵部安能不  
為所惑者知與既寡攀援將誰近世復以知人為恥既

知而譽乃為之私反不若譽姻黨耳以此自悲不能無憤亦欲極老目之力不忘於文以思雪於後代之人耳吾兄豈常失味于是耶乃教之空門之說小人狹薄尚為激然之氣戰燎于胸中故九引達者之波而澆之而熱腹九熱未知其救也果兄之教後至是將有可開也自廣之詞紙不能盡不宣亞之再拜

答學文僧請益書

孺顏上人

上人足下辱書指問將望於僕人謂有解達可以梯進

之級猶畏過意請聽畢說幸甚昔之有善煅者火五金而別器一日化百狀而智用不竭然常薄產自給弟子相率而笑之曰夫子之於業工矣然而市售之富不能當陶之饒何也對曰夫陶者淺勞而薄利與俗相用彼朝市而夕隳失其用復從而市之無虛日故能饒且吾之業搜其度而運其為及其成功于世終始彼匹居之人又安能罄其室而市吾之工哉故常飢亞之悞學為黃金之鍛且已困矣上人無乃襲飢於此哉非敢自重

誠恐以陷其所從耳幸孰慮焉亞之再拜

沈下賢集卷八

欽定四庫全書

沈下賢集卷九

唐 沈亞之 撰

序

送張從事侍中東征序

去年淮夷誅凡諸侯執兵者皆統在侍中故侍中得坐  
制於大梁以長子常侍帥萬人臨事破豎北勁皆先諸  
侯軍故宣武論功得為上今年齊淄不順命天子復使  
討園其境之諸侯咸會兵四塞於是侍中空大梁驅甲

馬三萬騎與攻壓之具金鐵草木飛石騰梯之器載而引者亦三萬乘擇日出夷門門下之賓叅于幕者張生從焉生舉進士得第因東客於侍中門以協律銀綬而居侍中器之以為敏良可親起居必與俱及考釭有期故謂余敘其所以云

送叔父歸覲序

古之取士得明經為清選近世即為進士亞之叔父獨謂古道可恃乃曰我儒世家也當勤經策義取高第耳

業之三貢果得中遂理橐言歸亟思以賀為高堂之壽  
嗟乎斯古孝廉之職叔父盡之無愧耳及東出都命諸  
子亞之撰序詩以贊行云

送田令二子歸寧序

昔兩河之流未歸而中書公為魏將因其師喪故門下  
將卒咸以農事歸中書公天子從人之欲而拜之凡類  
之制無大小皆俟決於朝朝之命士卒有所不孰聞者  
往往孳孳一年而化其後四年天子討淮夷使其中子



布與去聲兵五年命討常山悉師臨淮南宮成七年淮夷

滅八年常山貢二郡赦之秋命討齊魯移兵東渡河急  
攻濟北九年拔之斬其魁以獻其秋入覲盡以昆弟諸  
子去魏從謁京師者十餘人十年常山帥卒常山人以  
其狀來告中書公由此得其事前白奏於是拜帥常山  
自以魏歸不十年天子之兵南滅淮夷東清兩河而曰  
中書公之勤也乃以兄為尚書留置洛以其弟執金吾  
以子肇為亞尹居岐以將軍右持節回中以肇為將軍

居北軍又以羣為將軍居列午為少將作牟為殿中丞  
以支恭玉昆弟姪俱以中書公蒙寵居官然皆謹恭下  
士人多以為當任與儒者比長慶初少子牟牟弟早令  
覲中書公明日出都門來顧余以云轂下名人文士必  
以文寵別欲余有撰於是與述終始之跡以塞其勤

送韓北渚赴江西序

或曰近世有府之侯邀士拜賓不由已之所尚而使羣  
居不類故有諛言順容積微之讒以基所毀四鄰之地

更効遞笑飛流短長天下聞以矣而其侯尚且不寤夫  
言諛足以瞽明薄毀足以害忠若是雖欲明其撓直而  
明莫之遂也雖樂聞已之所闕而闕莫之聞也彼思勤  
畏過者一牽於諛讒即爾而況已之所尚又使羣居不  
類乎是以慎行者之所畏也昔者余嘗得諸吏部昌黎  
公凡遊門下十有餘年北渚公之諸孫也左右杖屨奉  
應對言忠情勞其餘則工為魏晉之詩盡造其度今年  
春進士得第冬則賓仕於江西府且有行日其友追詩

以為別乃相與訊其將處者而誰與曰有引農生倥耳  
夫引農慎行其道不欺者也北渚之往吾無虞其類之  
患勉矣惟耳不衰於道而已

送韓靜略序

或者以文為客語曰古人有言仍舊貫如之何何必改  
作乃客之所尚也恢漫乎奇態紬紐已思以自織剪違  
曩者之成轍豈君子因循之道歟客應曰草木之病煩  
也使秋以治之維孱萌於窮枿之餘搔風被露相望愁

汝陽津下潛雖佳懿之彩猶且抑隱唯恐失類於慘禪  
菸黃之色耳安暇自任其所長耶即春以治之擢氣於  
其根昇津百體之上暢之風露而繡英作誇紅奮綺緡  
縹紺紫錯若裝畫揚花流香靄蕩乎天地之端各極其  
至使肆勇曜如是寧可以一狀拘之人有植木堂下欲  
其益茂伐他幹以加之枝上名之樹資過者雖愚猶知  
其欺也且裁經綴史補之如癰<sub>疣</sub>是文之病煩久矣聞  
之韓祭酒之言曰善藝樹者必壅以美壤以時沃灌其

柯萌之鋒由自而銳也夫經史百家之學於心沃灌而  
已余以為構室於室下葺之故材其上下不能逾其覆  
拘於所限故也剏之隙空之地訪堅修之良然後工之  
於人何高不可者祭酒導其涯於前而後流蒙波稍稍  
自澤靜略於祭酒其宗也導道十年而功就頗秀出流  
類今既別而延蔓將遊乎河江豈欲益其自廣哉惟其  
勉無怠

別前岐山令鄒君序

十年秋作

昔者亞之西游過岐山而令秩始謝余將就給食人曰  
故令雖貧然能卑人厚禮何不往舍也時方暑既見解  
帶座令衣弊繒短衣使兒孫姪捧案前賓食食已有客  
越而請曰聞令家無女使賤走賓客食必夫人親治之  
誠厚士勤矣且賓之來者無賢不肖皆即泯然齊飽是  
愚為冒矣而賢者安所愧乎今願擇之而厚給如何者  
令曰古者侯生亦有言人固未易知夫士以食而來我  
者留於門無繫帶之間尚已為久矣焉能待辨而後進

乎亦寧有給之一食而使其甚愧固如是雖賢愚何望  
哉客慙而退至今三年與令遇未嘗再會食客今令窮  
來京師人無假氣而延於進者嗟乎會予與令各有適  
故書前事以敘所憤云

別權武序

七年冬作

秦隴之地其氣雄而能產出奇夫良士由是古稱賢士  
大夫多隴西秦川在隴右數百里而隴峻水夷川之源  
出其左余吳興人生於汧隴之陽長而西望秦原水土



精神之氣昏旦異狀予又怪近世奇夫良士不繁出於此往者五年余自東來京師見中山劉定命言天水權武其人可教耳吾常語善於武武發言往往次道及出門行事多以言明日余過言之復其語則仁與不仁義與不義必汗流臍慄胷目如即事既罷定命又從容為余言志所未遑者則下涕頓首又曰吾有女弟欲以歸武願言成之事皆未及會余東拜親於江淮冬還都下不幸而定命死其親友赴喪者數十人武臨喪具事終

日繼哀無絕聲予持其手曰桑隴之能產賢由賢之能  
產德誠未窮矣既葬武當西去予贈之曰夫孝慈仁誼  
忠信廉直總於已曰賢辨是而行之不惑曰明子有之  
矣慎終行之夫金之為物也鎔而為器無不能然則將  
求為大用必圖於善冶者當其未善必更之當其善無  
墮鎔

序詩送李膠秀才

歌詩之所以為發寤其旨甚遠夫物情暢樂怨抑之感

吁而散之大空還會於風雲降於水土包聲於陶埴之  
器髣髴之變盡搖於樂樂之所感微則占於音章則見  
於詞微於音者聖人察之章於詞者賢人畏之故勤人  
之君欲以聞其下忠主之佐使以達其上夫往代之詩  
樂皆能沿聲諧韻今徵其文以觀之而其代興衰可見  
也寧近世學者固不變風從律耶何為其詞不聞充陳  
於管絃乎今樂府既闕所奏如有忠言之意衆所仰哉  
余故友李賀善擇南北朝樂府故詞其所賦不多怨鬱

悽艷之功誠以蓋古排今使為詞者莫得偶矣惜乎其  
終亦不備聲絃唱賀名溢天下年二十七官卒奉常由  
是後學爭踵賀相與綴裁其字句以媒取價嗚呼貢諷  
合韻之勤益遠矣膠亦諸王孫頗專七言詞始來長安  
人以為思轍賀今一不中第言歸故楚江陵下豈欲以  
廣其情於烟波顧有撰余乃敢悲敘詩歌之大端以為  
別贄

送杜慄序

初亞之提筆西入關留舍鮑溶於揚州溶出詩吟至夕  
過百篇而窈窕之思雜發亞之嘆息曰後生亦有繼之  
哉鮑溶前在長安常出入冢官杜氏家羣孫皆喜溶是  
時懷方學何虞詩於其音往往能自振激後可得也及  
亞之與生昆弟遊其相樂之愛故與溶等而溶言果然  
十年春生長上知生之志謂生曰巴漢瀟湘之水皆淪  
流於東合而為大江猛注於江陵揚州兩地之間其名  
山園連橫秀之色屬江而起前文者自馬遷皆經遊之

六代為詩之士而得聲名騰翔矣因命生去遊以廣其  
思三月生即路亞之喜鮑之知言又樂生受命之遊故  
終始以序

送同年任晚歸蜀序

十年新及第進士將去都乃大宴朝賢鄉士與來會樂  
而都中樂工倡優女子皆坐優人前贊武者奮袖出席  
於是堂上下匏吹絃簧大奏即暮既罷生揖語亞之曰  
吾家世居蜀嘗以進士得第吾少能嗣其業幸子之文

得稱甚光願為我序還家之榮亞之辭謝不敏曰願無  
讓曰始生與兄之來舉進士得絀及綴字為便口之句  
歷贅其文於公卿之門由是一歲而名八年成都貢士  
生名在貢首九年生與其兄試貢京兆京兆籍貢名生  
名為亞首生之兄亦在列下十年禮部第士生名在甲  
乙如是而後歸亞之以為相如還蜀之榮而生未厚也

送受降城使序

清河張生少以善言語應對聞長又好六符神畧嘗從

奇丈夫游至北邊歷塞經受降城以宗人蒙幸於上將軍受降城扼塞得與方鎮列方鎮諸侯時節更置其使通殷勤生以善言語故遂得居使者位今年夏生使於夏得其歡而還夫以節度尚書公專聲重義為天下望者重目故四方使其來者難如此不必言受降城之上將軍之善應對不辱於此而見其不辱也不必言尚書公專聲重義於此而見其專重也六月壬子尚書公餞使者於陽平樓命幕府賓佐相與追詩以為贈不以亞





之為不知言者皆願以亞之言為首

敘草書送山人王傳又

夫匠心於浩茫之間為其為者必由意氣所感然後能  
啟其象也此凡一舉志則爾而況六藝之倫乎余聞之  
學者曰昔張旭善草書出見公孫大娘舞劍器渾脫鼓  
吹既作言能使孤蓬自振驚沙坐飛而旭歸為之書則  
非常矣斯意氣之感歟今山人王傳又學為旭書居故  
吳公子光劍池山傍積十年而功就歷游天下慕其出

已者師之欲增其功也及至長安舍余家為余題故平  
盧節士文因感之聳髮寒肌謂吾友生曰願欲余敘其  
書意者豈余之文以感王生之志於鼓噪劒氣之志乎  
顧不敏誠以孤生之望也聊題百數十言以塞其志

送洪遜師序

自佛行中國已來國人為緇衣之學多幾與儒等然其  
師弟子之禮傳為嚴專到於今世益則儒道少衰不能  
與之等矣於其流亦有派別焉為之師者量其性之高


下而有授說故有瞑坐而短行毀刑而鼓談之道岐於是也十一年春予東上會稽還造江有緇衣洪遜從余假渡自言能贊導佛語嘗與其曹羣居講誦恒為宿輩推信他日復來言當之關中欲余以序之夫西都輻集之地居多豪縉得進於上前者車服之饒擬於卿士而遜得無欲乎在自勉而已余不知佛故序無以備汝曹之事

行勉贈尅躬先生

士之冠髮就履莫不多善以自襲必衆好惡於其裏好惡形則利害隙而其明一悞所燭習識之惟與生相老矣而幼善亦違也惟尅躬慎惑為能多即之故曰尅躬敬事則道容以尅人則偷尅躬而擇行不諛者處濁則清居族則睦結友則義字俗則化折獄則不濫夫玄黃之滋不能混玉之素尅躬之志幹以潔故處濁而能清愉宏之私不能玩於禮尅躬之氣和而莊故居族而終睦稼穡之報不終負於勤尅躬之行誠輸而勞先故結

友而能義河谷之湍不能返流而倒注尅躬之令重本而道常故字俗而能化蒙鑒之垢不固黜於磨尅躬之辨窮思極明故折獄而無濫若是者非勤道孜孜則多易違也或問於力行之先生曰善可遷而可無悔乎對曰吾何敢誣尅躬自塞而已先生姓崔氏字夏封生於唐臣子五代居官則克慮以事事假牧於巴梁其民生祀之處則克力以倉居於河濟之沂其友交給而助之既跡既明賢者稱之矣他日生往邠侯之命余贈而勉

之曰餘艗之舟腹萬斛而不盈浮波而馳終歲而不息  
載之者穫於馳耳及厭風水之適安於所留曷與一教  
之庾等雖坎坎循環之輪猶羞其止也顧潔狂之誠能  
思即哲居哲忘思則狂盖古者勉不息之勤言也先生  
其終勉諸



沈下賢集卷九

欽定四庫全書

集部

沈下賢集卷十二

詳校官監察御史臣范衷

檢討臣何思鈞覆勘

總校官原任中允臣王燕緒

校對官中書臣李 棻

謄錄監生臣王叔愚



欽定四庫全書

沈下賢集卷十

唐 沈亞之 撰

策問并對

京兆府試進士策問第一

問昔者秦襄公舉秦鄙之人逐犬戎於西河之外因其險而塞焉後代無敢逾始皇方列為小國而東有諸侯窺地之兵西有強戎不忘之怨未聞當時秦當籍卒於外而屈於敵也此一侯者之士尚爾况臣天下之大哉

今西邊制戎起隴黃花輔兩關

新故關也

自黃花拒塞倚漢

中南逾山綿阻極巴蜀自關紫隴西北會彈箏杠於河  
塹於朔方夾河而東倚豐而角宥天障居其西以控戎  
者凡七師邈迤數千里之間壁衝扼要之戍百有餘城  
若此足以流威而謹塞乎且戎之力不能加古昔之患  
而邊防與地之兵方秦之多倍百矣猶以不足於用即  
東取卒於淮南吳越東南取長沙至於衡山臨江更歲  
以易卒彼其土之人逾寒不曠而役之積冰之地役其

所不習用其所不能非獨饋輓不勝於費也及聞墮指裂膚之事父母妻子坐而興哀今欲疏罷徵之請則邊臣有失助之告如存乎舊規則贅疣而無用得失之端幸稱其當

## 第二問

問時皆曰縣令之官為能以化親於人矣訊其變化寵最之法曰歲益氓幾室賦隨而息之是令之誨人曰勞氓其來我者遂其所而保之吾能使吏不浸決不渝一

歲曰僑人籍而不賦再歲曰僑人賦而不役誠著而不  
衰四鄰之人逋而來者屬袖於道歲告籍於其郡達於  
連帥即遷之逋人之邑亦且虛籍以自蔽累賦於所存  
四鄰之邑更教數誨以召之賦累而不能反者更往而  
逋之四土之人環遊不絕輕去其鄉閭猶脫垢耳雖恩  
書亟降為之濯煦然猶虛籍為租日增而不止豈褒尤  
寵最之謬哉不然其咎安在衆君子皆含智負能惟其  
不恡嘉謀竚聞通理

第三問

問夫才之居人也自中正降短長之不相侔甚矣今士非列於朝請者必仰於吏部故歲調試千餘人即假疑於事使對書決之亦有冒買其書者莫有所禁其取舍之程考於字句耳夫櫨薨輓輻之具也細不掩短挾不模撓隨用有輳於今士一規而選授於殊執豈可盡其性哉欲去書判之選則有司者無以為准約未知何以而得其中也惟陳必中之言以程斟酌之度

省試策三道

問教化賞罰政之大端固並行而不相悖在交修而底於道漢文以恭嘿致理式合古風鄭產以刑鼎興譏是稱叔代昭然薄厚豈俟敷陳然則馭時自有宜急禮云不從其所行斯不亦教化之功乎又云使人有所愧恥斯不亦賞罰之羞乎若曰澄其源而清其流端其本而正其末陶然而臻福壽薰然而化暴戾體則盛矣如寬舒何是黜幽陟明為瞰察也其或舉一善而衆皆勸懲

一惡而衆皆懼進猶加膝辱過撻市效則有矣如削刻  
何是道德齊禮為虛說也今聖上思理股肱宣力有司  
登選茂異周觀材器酌時而行必有所先原始要終行  
能精辯幸陳其要無或蔓詞

對賞罰所以禁弊也不可使其弊也夫太寬則上逸而  
下偷太急則上勞而下怨下偷則怠慢生下怨則暴亂  
作故殷周之王因其弊而更張之因人利而改作之是  
以不相襲制而秦驕霸嗜利吞天下以入咸陽鞭百國

之貨以富宮室當是時秦法行於四海天下之人側足而立漢興悉蕩煩苛與天下更始樹可守之法使賞必能刑必罪至于文帝漢天下已四十年矣文帝躬節儉務簡易因其時而若子產者當徵諸侯爭霸禮讓流喪盜賊羣起鑄鼎著刑以救時耳今可法之理於近莫如太宗龍興革亂隋之殘政脩法度立中庸圖堯舜為鏡於前用以為明白之理使房杜為之相輔不及當時之風一化天下流乎開元井閭之人反朴若先古然夫既理



之代理之在中而已矣猛則救以仁寬則輔以毅孔子亦曰從容中道聖人也亞之雖不肖然讀其書見三代之作如此秦漢亦如此太宗中庸之理又如此且貞觀之來非遠而鄉中之老往往猶有詠其事者伏惟明徵之可從容言於上前

## 第二問

問文武之道布在方策博通其舉唯君子能之是知超乘穿札非謂武也搜章摘句非謂文也苟不通乎源流

而徒習乎藝事工則工矣是謂末節者終軍班超奮於  
文儒有請纓投筆之志壯圖急病何代無之乃有淮右  
小醜久稽天憲聖上深覆燾之念極綏懷之仁網開三面  
舞引七德而鼠盜蜂結趙趙未賓忠臣義士有以憤激  
今詔既下王師鼓行視彼兇殘坐見殲蕩誠太山洪河  
壓卵注螢不足以喻然衆君子備詳前志多綜流略必  
有善師善戰之術七縱七擒之方一為指陳悉徵備要  
將求其可上達宸聰如或出乎竒秘亦當明密以聞獻

對亞之提筆之士也區區討論之間迷失聖意究未能得  
安足與論功伐之事歟雖然前歲亞之覽古於濠梁從  
容觀魚之地而濠人有習知蔡兵舉止者嘗謂亞之曰  
自吳少誠叛已來王師曾會德宗尊仁宥罪詔天下悉  
罷襲蔡之人雖蒙恩然日夜益訓甲卒堅城深澗芻食  
盈廩積至今十五年餘未嘗一日忘戰非有他居反側  
之間唯恐為所襲耳而四境之郡備禦已罷雖數更其  
守未嘗聞一守留心下人牧愛百姓皆能名虛軍畜肥

私狗馬田園陂池之利用以自入務行金繒卜射幸臣  
祈遷乎善地而蔡益知其境之虛果因喪而橫前日壽  
州失利則固然也今又欲兵徵四方使來會用於小凡  
蔡即北取趙魏燕齊西取寧隴邠岐西南巴漢南取甌  
閩東取吳越皆是提遠趣而萍合相容於其山川險易  
曾不影響又未聞其將軍稱者使其士卒一有父母妻  
子之念是寧能死志一方安所為聊且勞給非所為也  
爭鋒則失利坐守則厚費今議者或以為不足於給皆

非也而屯集師旅亦非也今必欲不計時而誅之獨有使才人為近境之郡至則籍其郡人父子兄弟五十已下十五已上除習兵務農無得自用者如是不日而兵足用賊可滅矣其餘未可利也如其擒縱之法出於一時者不可先以悉數謹對

### 第三問

問贍軍國給公上出於物力其賦稅之謂耶煩則擾罷黎省則乏經用縉紳多士之論及此也莫不曰擾農困

商敦本抑末知倚市者為獎梓稼者誠勞必在乎慎擇  
臨長之官加重耕織之出今牧宰非不選也而富庶未  
至衆貨非不制也而粟帛猶輕用何方可以致龔黃蒲  
密之理以惠康吾人用何術可以均衣食緡錢之饒以  
利澤南畝斯上心所注亟以延問觀光之士期為指明  
對百姓之貢輸賦患不在重而在於勞逸不均也今自  
謀叛以來農勞而兵逸其租賦所出之名不一猾吏撓  
之後期而輸者則鞭體出血若聲仍終不得蒙不忍欺

故豪農得以蠹奸賈倍之而美地農產盡歸豪奸益其地資其利而賦歲以薄失其產者吏篤其不奉而賦歲以重是以割姻愛棄墳井亡之他郡而不顧亡者之賦又均焉故農夫蠶婦蓬從鹿走於天下而道死者多矣由是商益豪而農益敗錢益貴而粟益輕也今返之法必在刺史長吏而擇其良者使久留於任一年政成一階之官一歲一加之三年而政成者歲加之異政累聞者五年而後遷之連率不如法者削其本不得齒則

庶幾乎其化矣謹對

西邊患對

元和十有二年夏六月亞之西出咸陽行岐隴之間採其風得西土亡降故老謂余言邊之所以為患可痛之狀辭未條悉或短曰惟叟以西戎蠕蠕之旅而為邊出苦言使聞北塞匈奴雜虜之風叟曾不哭也蓋天子之憂甚勤與師長分節符給所用以事邊何因對曰不然今言所以為患者非一因此而邊兵不得習伎險不得



為固百姓不可為生如此吏尚輕易之然則北虜匈奴

雖以逸馬強弓乘嚴時南馳其來衆不過數千其所掠

民財貨一人所舉而已由驚隼不能止屯兵留塞且北

過千里而屬烽望其興塵知奔蹄之幾

受降城故事云虜南下望其塵

高下則知衆寡

視其狀則烽燧次發然後收民畜嚴壁而待之

且每歲八月戌有清野之火使其馬無所食彼縱至

不暇解鞍而旋矣而西戎則不然其衆蟻聚多包山川

沮陸之利其兵材雖一不能當唐人然其策甚遠力戰

不患死所守必險所取必地而唐人軍中以為材不能  
皆易之故自安西以東河蘭伊甘及西涼至於會寧天  
水萬三千里凡六鎮十五軍皆為西戎有由易而見亡  
也聞其始下涼城時圍兵厚百里伺其城既窘乃令能  
通唐言者告曰吾所欲城耳城中無少長即能東吾亦  
謹兵無令有傷去者城中爭呼曰能解圍即東其後取  
他城盡如涼城之事由此人人皆願生無堅城意自羅  
其策以來為語相傳尚近奈何客獨不聞其說乎岐隴

所以可固者以隴山為阻也昔其林比繁故戎不得為  
便道今盡於斬伐矣而蹈者無有不達且又虛兵之號  
與實十五又有非戰鬪而役入山林伐麋鹿羆麕麝豪  
豕是徭者居十之三窮巖險障剝繁取材斤聲合叫不  
息於寒暑是徭者居十之四發蓄粟金繒文松大梓奇  
藥言禽薰臭之具挽轅於陸浮筏於渭抵咸陽入長安  
部署相屬是徭者居十之二其餘兵當守烽擊柝晝夜  
捕候者則皆困於饑寒衣食或經時不賑顧其心怨望

幸非常尚能當戎耶是皆賴主上神聖彼戎畏其化而不敢東乃今岐隴之土甚饒農食不充秕稗衣結縷無帛布其租稅納粟官一而耗倍細吏憑法而要賂賂厚者雖逋亦寬之粟雖後至必亟與符賂薄者或稽一日即白吏笞之粟當輸則曰次當某人又當某人故有累日而不得倍數矣其他征徭倣此農盡所獲不能也出其費尚無不忍吏視民由蓬息而處又何聊生今所患衆多其略可痛如此長吏終不省尚輕易之噫奈何為

不困

賢良方正能直言極諫策第二道

太和二年

朕聞古先哲王之理也玄嘿無為端拱司契陶甦心以  
居簡凝日用於不宰厚下以立本推誠而建中繇是天  
人通陰陽和俗躋仁壽物無疵癘噫盛德之所臻冀乎  
其莫可及已三代令王質文迭救百為滋熾風流寔微  
自漢而降足徵益寡朕顧昧理道祇荷丕構奉若謨訓  
不敢荒寧任賢惕慮宵衣旰食詎追三五之遐軌庶紹

祖宗之鴻緒而心有所未達行有所未孚由中及外闕政斯廣是以人不率化氣或埋底災旱近歲播殖愆時國廩罕蓄乏九年之儲吏道多端微三載之績京師諸夏之本也將以觀理而豪猾時踰檢太學明教之源也期於變風而生徒多墮業列郡在乎頒條而干禁或未絕又在乎按度而淫巧或未格俗恬風靡積訛成蠹其擇官濟理也聽人以言則枝葉難辨御下以法則恥格不形其阜財發號也生之寡而食之衆煩於令而鮮於

理思欲究此繆戾致之治平茲心浩然若涉泉水故前  
詔有司博延羣彥佇啓宿懣冀臻時雍子大夫皆識達  
古今志在康濟造庭待問副朕虛懷必當箴主之闕辨  
政之庇明深條之所紊稽庶富之所急何施斯革於前  
弊何澤斯惠於下土何施而理古可近何道而和氣可  
充推之本源著于條對至若夷吾輕重之權孰輔於理  
嚴尤底定之策孰叶於時元凱之考課何先叔子之尅  
平何務維此龜鏡擇乎中庸期在洽聞朕將親覽

對曰臣聞古者君天下之心也上降下應還若影響夫  
以身而養人者下以父尊之雖衰而無怨此神農之俗  
也以道而覆人者下則欣戴之雖衰莫得離其下此黃  
帝帝堯之俗也以義教人者下以神敬之雖衰而無慢  
此舜禹之俗也以刑戮而驅人者下以刑戮而畏之不  
俟衰而刑戮復矣此桀紂之俗也今陛下廓神睿之宇  
臨天下將三歲矣索舉賢良待問之士聚而俯告悉徵  
所達以輔於明臣幸得見墀級之嚴陳王由戶之道臣



之所奏善戶有三神農唐虞之化是敗戶有一桀之亂  
是彼三善之戶其門甚闢皆可循轍而進唯在陛下命  
車而已矣制策曰厥聞古先格王之理也玄嘿無為端  
拱司契陶眡心以居簡凝日用於不宰厚下以立本推  
誠而建中繇是天人通陰陽和俗躋仁壽物無疵癘噫  
盛德之所臻豈乎其莫可及已三代令王質文迭救百  
為滋熾風流寢微自漢而降足徵益寡者間有以古先  
玄嘿無為之化及三代質文迭救之法易難相殊者臣

請指數而奏之夫數之始生起于其一而歷乎多數在  
盈十之間雖童子且能屈指而數也及延乎億兆塞乎  
天地雖明大人猶難舉籍而造其極夫饕餮者始生魄于  
嬰而蠢于蒙蒙嬰之時不俟更乳而飫矣及形具氣周  
設肥牛之肩加百品之佐不足以塞其饜也是則太古  
之人衆庶之俗其由數之奇寡饕餮之蒙蒙乎無越無踰  
蠕然濡之無營無慮愧守俟煦為之君者易其化五帝  
主之何以異賁育之材舉一毫而趨也三代以降衆庶

之情缺變之俗其由數之億兆饗之周壯也君之者廣法  
制以御之飾禮義以導之明賞罰以齊之然猶不能使  
下表夸無益也臣聞聖人高明而道中庸者法常制定  
使人無加踰于節度猶恐其久而為弊即以日新之言  
以勸誨使不為常也如其臨理有常制豪猾何致踰檢  
乎講習師受有常學儒者何致廢墮乎黜陟幽明有常  
令列郡何致干禁乎車服室屋有常度工者何致姪巧  
乎易問先迷失道之常也然照育之神不測者以其既

弊于夕而能更興于晨使其光日日新也伏惟陛下觀  
日新之道以張化源復何俗恬風靡積訛成蠹之患乎  
制策曰其擇官濟理也聽人以言則枝葉難辦御下以  
法則恥格不形其阜財發號也生之寡而食之衆煎無  
已臣恐鑠於所制也伏願陛下脩日新之德察善政之  
臣行尅已之令以拯其弊然後可以垂衣而化也制策  
曰故詔有司博延羣彥佇啟也陛下如能用其道可以  
澤惠下土也如使理古可近者其在明禮樂仁讓也若

使和氣克充者其本在和人心之邪慍在理之雅正也  
其理拂者衆氣雜其理明者衆以洽夫衆庶之情和平  
慍抑之氣吁而散之大空還會于風雲合于水土包聲  
于陶埴之器每歲附陰而伏乘陽而昇衆庶之氣雜  
于陰陽陶于變化者由麴蘖乎慍氣居于中則戾戾則  
悲悲則水潦敗抑氣居于中則悖悖則亢亢則螟蛾生  
平氣居于中則序序則得常得常則風雨節寒暑時和  
氣居于中則泰泰則有餘有餘則交讓於變化涵而為

休寶流而為精神洋衍乎祥光沛濺乎佳澤臣故曰充和氣者在調人心也制策曰若至夷吾輕重之權孰輔于理嚴尤底定之策孰叶于時元凱之考課何先叔子之尅平何務維此龜鏡擇乎中庸期在洽聞朕將親覽者夫廩畜之所賢者在乎賤入而貴出使人無所困饑於凶災傷勞於豐賤也夷吾之權微不可也從古已來西事戎者或辱于盟而困于嫁非有他由擾其鋒而侮其醜也及其所窘搏則啁物以其兵矣戎夷之生無以

異也故聖王備而不擒也嚴尤之言亦可徵也自長慶  
寶厯已來金紫銀朱之佩盈于朝逸于郡國有紀何者  
今日布令明日而隳使人無所守是以紀綱不振也且  
教令所以設備為防也綱紀所以制物樞用也是皆虞  
患難拯困也人有赤子沈于水火者為之父母必將奔  
往而拯之使免於苦及無為救者則必坐悲而泣望也  
為救之具必在長綆之鈎修竿之挾乎有備而防者父  
母之人也無具徒手者雖悲不信也今陛下之赤子亦

以困於是矣陛下亦將拯而免其苦乎今法制委弛維  
綱不樞則是修竿長綆之鉤挾不為也陛下居于九重  
臨于兆庶得無有坐悲泣望之恨乎臣竊為陛下懼不  
仁之尤於後代也伏願陛下擇忠言以廣其明察智謨  
以周於用一刑賞以信於令薄賦斂以息其勞慎禁奪  
以省其犯審獄訟以愛其生如此水火之陷不牽於瞽  
瞞之俗矣多濟之防充列于無患之朝矣若是又以為  
不理不康不惠不仁非臣所知也謹附聖條陳寫大略



冒黷之罪臣何敢逃謹對

賢良方正能直言極諫策

長慶元年

皇帝若曰蓋聞舜禹之有天下也起于側微積德累勤多歷年所盛聖人慮豈有遺哉然由好問察言勤求賢士蓋以承祧之任重憂人之志深也況朕長於深宮涉道日淺奉列聖之鴻緒撫萬寓之矜人夙夜嚴恭不敢有懈實懼燭理未究省躬未明所以詳求讜言以補不逮予大夫是宜發所蘊蓄沃予虛懷當極意正詞勿有

所隱昔王者之政必臻于康泰霸國所立猶致于富强  
我國家提封溢於三代酌憲兼於百王無堯湯之災積  
祖宗之理而人未蕃庶俗尚彫訛家無蓋藏公闕儲侍  
卒乘之數貨幣之資統而校之莫繼前代豈率土生殖  
變於古歟將阜時政令戾於今歟固已揣摩必究利病  
明徵末失之漸具陳興盛之謨且文武兼學以成身仕  
農迭居以豐業故家給足以戀本才周足以應時近古  
各循一端不相資用致令從事異心難于成課民佚無

守輕為情遊指明共貫之方期合二途之利永言化理  
期酌厥中施為或差得失斯遠將修睦勸善則在下難  
知將任數馭情則人心益偽思聞指要得合誠明精別  
比周之情敷詳忠厚之道知人則哲從古攸慎九徵恐  
泥五事難精或望可服人而才非周物或言皆諧理而  
行或乖方宜陳取舍之端用彰真偽之辨至於朝廷之  
闕四方之弊詳延而至可得直書退有後言朕所不取  
予大夫其勉之

對臣伏念目之色明其在昏夕之時則與盲者等及屬  
日蒙光乃能寤玄黃披萬類傑智之才其處濁俗之中  
則為愚者混非遭聖偶時安能樞陰陽育萬物其理一  
也盲者雖蒙光莫能視愚者雖蒙聖莫能賢其理一也  
故舜禹翔其光於上益稷之徒周其視於下其中縣白  
日而省離婁也三代以降君之光微臣之智狹見其手  
而迷其足覩其前而昧其後其由舉燭螢而臨庶目也  
今陛下神光洞天鑒彼幽塞猶懼理之未至故親省羣

言而臣瞽愚非能逾于智傑應陛下之清問臣以相與  
貢臣以賢良應詔微臣所冒非任當伏竄弃之尤不足  
以塞罪乃輒伏進所敢言臣伏讀睿問周視聖旨見陛  
下思天災之病也臣愚以為皆由尚書六曹之本壞而  
致乎然也今請統而條指之睿問有念人俗之彫訛及  
于卒乘之數貨弊之資臣請以今之戶部兵部之壞舉  
之睿問有才周於文武本固於士農臣請以禮部工部  
之壞舉之睿問有欲以辨行之真偽臣請以吏部之濫

舉之審問有以朝廷之闕臣請以刑部之失舉之審問  
有四方之弊臣請以山東隴右之急奏之伏願陛下詳  
臣之言察臣之志無以臣微而忽其奏也臣聞周設六  
官以統百辟立國八百年其由綱之不絕於所制故也  
太宗龍興革魏晉之殘政修法度立中書設尚書六曹  
以序班文武以條系天下號令既布而萬方區矣愛其  
人若愛己之德保其黎庶若保幼子恐其有墜也故明  
四目以先其視指教其未見也達四聰以先其聽開喻

其未聞也尊賢之言而為視聽視聽先張則黎庶不陷  
於災害而康泰矣後代雖有盜臣姦夫而終不患其亡  
由綱之不絕于所制也夫尚書六曹之設猶人之有六  
腑也耳目口鼻之樞系于元首手足之用闕于肘膝其  
氣根血脉皆統于六腑符而命之然後能動用失其用  
者非邪則眩夫人莫尊於首故足司其履指司其所執  
百體之司各勤其用則首安其尊而不勞首之處身猶  
君之居上也百辟以位則君安其尊而不勞明矣今尚

書六曹外雖備其官而中實繆今之俗凋訛者其由戶部之綱不理也昔戶部其在開元最為治平當時西有甘涼六府之饒東有兩河之賦仰給之卒不過四五帥其餘利殖所入盡與齊人四十年間富庶滂洋之若是及一日上恃昇平之功相肆威驕之佞直言得死諛色或進轉掌之間清蹕巡于巴蜀矣今西涼為虜兩河為兵盡開元天下之兵不過當今數郡之卒勝衣之農而百徭出矣鞭役重繁不勝於籍權之不顧其害刑之不



問其深吞危衆多欲無凋訛不得也兵部之選武士益  
繆矣武夫試射百矢為重騎射次之騎戈亦次之此武  
夫賦者之宜業也而真者百無一焉其餘盡買豪奸之  
輩役者以待冒入奮戈戲馬者亦得中名則估肆富人  
之子弟彼安能致武之所用顧欲占籍自恃以逭徭於  
鄉閭耳而欲卒乘貨弊之充強臣未見也今兩河之間  
至於幽薊連屬西邊北邊而仰給之卒多於其土之齊  
人十九在兵部者所操曾不能制一校尉而况紐其綱

乎古者兵農之一體也三時務農一時習兵故春耕而夏植秋藏而冬講武誠願使兵部之綱維根於古道之要兵部之令加于將帥之臣則本久益大矣何卒貨不充於古哉今禮部之得進士最為清選而以綺言聲律之賦詩而擇之及中為仕也則責之不通天下之大經無王公之重器今取之至微而望之甚大其由擊陋岳而望曲于韶濩也今仕進之風益壞矣必以陰詐為朴陽明為狂顧以武為污矣而况兼學乎陛下何不令禮

部之臣督其所業雜考其所能則人可化矣夫惟博大之士為能兼學耳夫持綱舉維非博大之士不能也夫求博大之士非竭誠不能也故殷宗之竭誠于神神感于夢而得傅說周文之竭誠于氣氣感于兆而得太公陛下如能用殷周之誠而求之何患用才之不至矣今工部之綱之不舉其由百工之不條理焉且務於濫則能速壞惑于邪巧則多改作速壞相仍改作無已欲使財費之不窮工力之不竭臣未見也夫堯之功與天

比覆居於土階之上蔭于茅茨之下土簋而具禹親勤水而卑宮室是二君者非不能極巧侈之端故處陋而無厭蓋欲使天下之人自然而儉易也而周官百工之職一於六職之書詳矣其後昏君亂主未有不極遊觀之娛窮巧侈之樂恣羅紈之靡雖有生植之衆不能足充虞人之裁雖盡隴畝之農不足塞百工之役雖竭蠶嫗之勞不足給綺綵之貢秦隋之末君不如此不足以隳社稷今仕家不著籍於鄉閭亦已矣則農夫唯恐他

業之不容于趨也安肯顧其本而戀其土哉伏願陛下  
仰堯之聖敬畏秦隋之敗奢念漢之節險凡在百工之  
用關於將作內作技同者必使統於工部以觀制作之  
度使勞費之怨不起於下人則堯聖禹明周規漢儉為  
陛下擇耳何止士農之固業哉今吏部之補吏歲調官  
千餘其試以偶文麗語之書程以二百字為准考之  
能否以定取舍直使其人真能然尚何以補況十九皆  
偽人乎以是而求其實不可得也且昆吾之利莫邪之

才雖巧用不能雕咫尺之木鷲鳥之羅雖善掩者不能  
拘蚊蚋如使恢宏博大之士裁心鏤舌於比辭而其道  
安可見乎陛下何不命羣官立於朝者歲各貢所知各  
以其所長試之各以其器任之不勝於任者罪罔上闕  
其貢者罪蔽賢而治聞者爵逾次禮部吏部以時舉籍  
刑部督其不察如此則人人爭好賢人人務克己何患  
乎真偽不可辨哉今朝廷之闕衆多其最闕者刑部刑  
部之綱不舉其由賞罰之不信勅令迭降而相違故有

行之於今日而廢之於明日罪之於此而赦之於彼是謂慢易詐欺之藪耳欲無枉撓不可得也誠願斥其煩苛去其相逾則人人易守難犯然後命儒賢究掌之不明於此者不得為刑部之官無令猾賊之徒輕身重貨竊法以自弄如此則清矣賞信刑果則遠罪修已之風序今非止於闕蓋將病且瘡矣夫病者其在皮膚則易也六腑尸繆氣非所經而其體瘡不亦危乎臣請以醫方之言諭國之病伏惟陛下察焉臣聞良醫之理瘡也

陳以奇方進以猛餌外以針火導其血絡藥病相攻戰于其中及痼解病瘳六腑亦憊於是竭良材調德膳以味從而補之然後六腑平百體正內強而和外矣夫近代之愚醫則不然必使病勝而形羸不危其身者稀矣三公六曹國之六腑也果刑信賞國之筋絡也九州百郡國之百體也四夷八蠻國之外膚也驕荒淫異國之痼病也嘉謀長算國之奇方也強將勁兵國之針火也禮樂法度國之德膳良藥也夫百駭具於外六腑列



於內相假而成生相致而動息本為一身也及一腑失  
理容而不攻其久日大攻而不除其久為痼除而不補  
其久復發為瘵難矣臣以為天寶胎痼始於一支久而  
容之侵及百體幾危其形玄宗肅宗除而不終痼反興  
元德宗之時又無良臣可進內強之術而攻不就先皇  
攻于除而不攻于補今乃復發于幽冀居國之左足又  
有西戎之屬居于右掌之膚涉腕逾肘今已及肩何以  
知其自掌而及肩也以安西至於涇隴一萬三千里其

間嚴關重阻皆為戎有由此知其及肩也則王畿界戎無五百里此肩之去喉能遠乎奈何容而不除也此皆發于中朝之闕而流其病也若四方之敵莫若山東隴右之急莫若武備之不至又請詳舉之夫聖人之母萬物必體天地之功故以陽為文教極其光明也以陰為武備盡其肅厲也夫陽盈則韜而陰藩之陰盈則復而陽濟之故能相理而不亂五月陽盈使一陰居其間明正陰之有位而盜陰不生故聖人因之修武備至于十一

月陰盈包將來之陽可大可久也故外作雪霜以勵之  
恐僭陽之通也內密燠而養之使其為文為光也故聖  
人因之求賢以為輔電凍霜雪禁其煩蕪陰用也故聖  
人因之以正刑雷風為前驅蕩其所不通溫光從而舒  
之陽德也故聖人因之以文宥是以聖人之德文雖光  
而武備不去前年淮夷擒齊魯滅常山死幽燕歸臣未  
見制法有方法也而議者且以為兵可戢也遂用羸將  
守常山滯儒臨薊北不旋踵而賊氣復振矣伏願陛下

慎動誠盈無傷陰之大候且行化而使人舉兵在立勢  
夫百斛之車百蹄之牛不能搖其轂如措之峻坂之上  
授之力者不盡數牛及轟然而遷則牛足之運不及輪  
奔矣此立勢之樞也今幽冀之兵其由病者之再病矣  
乘虛而強履獨有立勢而誅之立勢之急在於聚威於  
深棣實力於滄定然後以趙魏臨常山環兵而攻之則  
冀馬之蹤不望合於燕蹄矣以太原之師入薊丘則易  
水之東左臂不能傍連矣此拘燕囚冀之方也如其擒

縱之法出於一時者則名將而用耳如其威不聚於急  
力不實于危雖有名將不能為也陛下見西制戎北制  
虜壁壘之勢盤運交錯兵甲之多賞勞之厚以為戎虜  
知畏此而不敢犯塞今以刑賞之不信也而戎臣以自  
入士卒虛名占籍者十五不啻日夜飛金壁走銀繒市  
言唯恐田園陂池之不廣也簪珥羽鈿之不多也洞  
房綺闥之不邃也不如此不足以積怨勞卒及寇來則  
必固壁閉兵無敢出擊者如一日戎戈東刃陛下將安

倚乎今北虜滑夏猶已事嫁矣而西戎之虛盟安足信之不可無虞也夫人性有勇怯地形有險易勇怯可以習制制之以刑則亡怯樂之以利則亡怯借之以勢則亡怯假如陟險利強弩以遲重者據之平陸利騎戈以捷手健蹄者兼之此得勢而亡怯也今士卒之獲者得其馬牛羊雜畜及衣裝寶賂皆與之無令有奮奪此顧利而亡怯也蒙兵失律者誅此畏刑而亡怯也如此而用勇備百矣臣嘗仕於邊又嘗與戎降人言自輪海已

東神鳥燉煌張掖酒泉東至於金城會寧東南至於上  
邽清水凡五十六郡六鎮十五軍皆唐人子孫生為戎  
奴婢田牧種作或叢居城洛之間或散處野澤之中及  
霜露既降以為歲時必東望啼噓其感故國之思如此  
陛下能不念之臣意西戎今冬當逾河拒北虜明年必  
大入靈武寇西城先擊監宥城能因此時詔寧隴邠涇  
及南梁皆會兵計事獨得以老弱留謹城其他少壯及  
騎士皆持裝佩鹽糗令邠寧涇原軍皆出平涼道彈箏

邠寧軍北固崆峒守蕭闕涇原軍西遮木峽關鳳翔軍  
逾隴出上邽因臨洮取鳳林南關南梁軍道鳳逾黃花  
因狄道會隴西得其利則擊因其牛羊足以供具各以  
輕騎入河蘭撫喻其遺人飛聲流勢延而益西敗故地  
盡可得也如此則王畿之內安有驚烽之虞哉臣固曰  
四方之敝莫若山東隴右今策臣之目曰直言極諫則  
言無所不直直不懼於罪也若諫無不極者今百不盡  
臣之一二焉何者答問之所及或未利於國臣雖欲漏



之而不解則必欲言之臣不寤也審問之所不及者當  
臣之言實有利於國臣雖欲奏之臣懼罪言於非宜也  
而况短晷之晨奔光馳曜之下筆之條奏拘以文陳乎  
臣所以憤懣之誠百不及于一二也豈無異日而顧問  
哉伏惟陛下察焉

沈下賢集卷十

欽定四庫全書

沈下賢集卷十一

唐 沈亞之 撰

碑文

臨涇城碑

臨涇之築跡於郝泚貞元年泚為涇將德于軍軍中皆  
推其公嘗從壯士數百騎出捕野還白於帥曰臨涇地扼  
洛口有洛川在涇州西北盡于臨涇其川絕饒利息蓄其西大野走戎  
道曠數百里其土乃流沙無能出水草當涉者盡疲即

屯臨涇為休養便地願以城控之可艱其來泚出其傍  
一人謂帥曰誠而泚言有是也雖然公自念之公所以  
蒙殊恩大幸子姪昆弟俱得不業而官者蓋以邊防未  
可制上心日夜懸於此故厚公之事無所難今用泚言  
則邊已固公安倚耶雖戎不得越所趨而捕者復何以  
稱獲使上聞之亦且輕所憂矣遂不從泚計及帥死其  
校段祐代為帥歲餘泚又白曰昔天寶時天下有兵為  
防者獨西戎矣而邊至王畿尚萬有餘里其烽叫之驚

東不過燉煌張掖之間又有嚴關重阻盤錯之固綿屬

於其中迺者燕人反

安祿山史思明也

其邊兵強壯悉會難咸

陽東而西陞復為所攻盡亡美地今王畿之傍列為邊  
郡飛烽傳候昏曉之際必奏于帝垣況未有可固今每  
秋戎入塞寇淫驅其井閭父子與馬牛雜畜焚積聚殘  
廬室邊人耗盡而又以一方便宜委決於將軍何以自  
塞夫臨涇之築於涇甚便前年泚白於故將軍不聽今  
日幸願將軍省計遂築城於臨涇以泚部鎮之自是戎

無敢犯涇者元和初祐入覲因留宿衛後為帥者惡泚  
能強涇以年朽不任兵罷之八年余西道塞歷岐隴而  
邊人無幼老盡能誦郝泚之功故余悉著所論勒其事  
於臨涇城

墓誌

靈光寺僧靈祐塔銘

十一年夏作

釋家之法以弟子嗣師由子其事死送葬禮如父母由  
是籍書贊記之常名而不姓今通氏言釋者必祖自佛

派分諸系於七祖各承其師之傳以為重望而律師光  
範者始為童子時事師曰靈祐且滿歲師與其曹為狀  
喻之語而律師侍側輒達其至既學五年而通經記年  
及冠遂去髮被褐言語應引則老緇不能對矣大厯中  
詔度始成僧儀初居吳之嘉興空王寺其後緇衣男女  
相與誦其能於是俱使授學更居靈光寺遂與其徒講  
贊微言百流會歸之說自吳南北郡邑緇衣咸果受人  
人自得若濡露然又著會釋章句十五卷貞元十六年

十月某日滅於其寺之居僧年四十五壽年七十四遺言令其子弟曰當殯我寺之居西園中其後四年門弟子相與成塔於其所元和中余遊吳弟子明辯來求銘焉律師字楷其家本吳人其鄉里存吳之崑山縣曾祖師利開府儀同三司食邑三百戶祖亢亮於潛令父君卿彭澤丞母河東裴氏其子與明辯之列凡六人皆童子受學是哀事之儀由子也作銘其詞曰惟寂之門嗚呼已矣匪媿匪育孰後爾已能傳其心即繼乃嗣以圖



我銘以紀萬祀

涇原節度李常侍墓誌

府君諱某太尉武穆公光弼之少子也為人健毅意氣  
祖楷落自匈奴提其屬來入始為唐臣累遷至將軍贈  
司徒武穆既壯當天寶末以平燕寇有功故公於提襁  
之間得賜校書郎武穆薨公少無所倚薛兼訓憐之奏  
賜殿中丞後從朔方軍事汾陽王於邠又從東平軍事  
李正已於淄青正已恃公說之以善語雖不從然得重

賜與馳歸即從宣武軍司徒勉公使於京而賊希烈攻  
勉城拔公不得赴乃從淮汝軍事哥舒曜于東都興元  
中行營為先軍得試將作少監兼侍御史後從義成軍  
再事賈耽於滑得兼御史中丞貞元九年入為左神策  
左將加都將元和初加御史大夫二年出鎮同官四年  
加右散騎常侍遷宿州刺史七年改安州刺史九年入  
為右羽林將軍十年春加左散騎常侍拜節帥涇原既  
至聞士卒前以食不賑而鬻子者皆與贖歸之夏六月

公疾發視政不能勤七月十二日薨行年五十九贈工部尚書發御府粟帛命官即其家弔勞生子男三人女七人長女適焦氏娶竇氏夫人生嗣子罕夫人卒娶潭氏潭氏亦早卒公將葬使卜兆兆言合葬不宜罕從卜竟祔先將軍太尉之墓於華原其原乃用亞之為誌以銘其所詞曰

惟漢都尉肇自其源居彼北方繼世不還乃公之祖始為唐臣武穆嗣毅即我家勲帝念不忘公亦為藩乃葬

王畿北指華原嗚呼哀哉惟功與魂千古不泯

唐故銀青光祿大夫檢校左散騎常侍兼宮苑

閑廐使駙馬都尉郭公墓誌

府君諱某其先關西鄭人也大父汾陽王始以戎勲著  
績為朔方軍副使天寶末玄宗南巡巴蜀肅宗勞兵於  
靈武乃率其義虜順夷合兵遂叛得為朔方軍節度既  
而二駕還都拜為中書令統兵於外代宗初大戎飲馬  
昆明至於御溝天子在陝又以擊逐之功益拜尚書令

封汾陽王尊稱尚父乃詔子曖尚昇平公主都尉主客  
皆賢故長安中名人文士自李端司空曙之徒咸遊其  
門賦詩席酒更日而主生子男三人女二人長今為皇  
太后府君即其少子初憲宗居邸時親臨主家納迎如  
禮及今上即位皇太后昆弟皆寵錫尊官而府君最少  
益蒙隆念自邠州刺史入為殿中監尚西河公主歲餘  
改宮苑開廐使府君寬柔和易不守剛決長慶二年七  
月五日暴疾卒于主家享年三十七太后聞之驚悼悲

哀使者自中宮出按問發疾之狀月餘乃解以其年十二月十九日葬於京兆其原之上初西河主前降吳興沈氏生子男一人及郭氏之喪無後而以沈氏之嗣為之主辦卜葬有期主喪者使其家吏牽馬操幣至於櫟陽即尉家曰尉之文記事有聞矣願得為之銘以誌其壙於是與序勲興之事表於墟中云詞曰

河族崑崙命源惟長跋於神華其來泱泱影響邁會披華吐章靈烟氣交鼓而興祥陶以精神涵為濃光保我

國步乃生汾陽在戶作扃橫天為梁息灾破難以藥疾  
瘡帝子入室固知維綱孫為國母沙麓以昌少為姻臣  
謙寬汪汪祿而不壽哀彼中霜惟其流慶與唐無疆

故太平令李寰墓誌

長慶元年故太平令李寰之喪其妻沈氏挈其稚嗣哭  
丐於姻黨之門以事其殯事將具命其族亞之為銘以  
誌其壙府君唐之裔也其先奉高祖入關定隋封定州  
刺史曾祖承昕為鴻臚丞丞生少連為激水令令生牟

為縣尉尉生府君世以宗廕調官卒無達顯貞元中沈氏始以外戚隆貴而胄得為列卿掌太府乃以子女歸之府君府君貧負其屈而家仰給為生元和中調為太子令卒於官舍親黨語為善人多痛之銘曰

廓乎圓穹覆乎萬古之中賢者或塞而夸者或隆唯達識不窮善人有終哀哉

沈參軍故室李氏墓銘

漢孝武時匈奴累犯塞夫人之先為都尉出居延力戰



且陷遂與其部居胡中為貴落其後入唐為功臣世世以武績顯至大父臨淮王光弼父尚書彙皆為帥長及父沒門下客沈亞之請其屬以夫人歸於從祖之子曰稱師從祖諱房當代宗時取良家配帝其姑以妃受選入宮生雍王沈氏之先繼烈組冕顯於籍牒者皆由文學及德宗即位追尊皇太后太后昆弟父祖既追封矣其子姪皆蒙寵廕遂以房為將軍執金吾冕為卿掌太府羽為駙馬都尉尚長林主夫人既嫁三年而卒生子

男未能視在元和十四年正月六日具葬城南次于沈氏之隴作銘其詞曰

冗葉雖榮逮霜霰兮勞飈罹災延而眉兮韶妖之葩筭  
刻晷兮觸烟寤露條委衰兮玄金蒼礫安靜鎔兮紅瓊  
海碧包脆危兮嗚呼夫人曷而得支姑啼夫哀叢咽伊  
兮姊弟酸眉垂涎淚兮悽風送魄罇生漪兮黃壙圓隆  
緘若帷兮明能之魄來而安兮無越違兮

韋嬭墓誌

四年春作

夫人姓王祖曰楚天寶中為吳王府司馬父曰新貞元  
中為杭州文學卒母河南姚氏永貞初嬪夫人於京兆  
韋氏夫人之嬪年始十四已能成嬪道年十八暴疾亡  
亞之姊乃夫人諸父之兄嫂也或謂姻家之喪必有賻  
亞之貧無貨請以文易之故韋氏之喪沈氏得為銘誌  
夫人之邦曰琅邪夫人之質多於容行多於和豈天不  
命於壽不多耶實既命短可奈何已矣蓮湖之西靈山  
東趾南極于江近十五里元和三年四月庚子而琅邪

氏之骨歸於是

盧金蘭墓誌

九年冬作

盧金蘭字昭華本亦良家子家長安中無昆弟有姊四人其母以昭華父歿而生私憐之獨得縱所欲欲學伎即令從師舍歲餘為綠玉樹之舞故衣製大袂長裾作新眉愁顰頂鬢為娥叢小鬟自是而歸諸姊不為列矣因恚泣謂其母曰今我不等我不若從所當耳年自十五歸於沈君二年從沈東南浮水行吳越之間從七

年乃還都又二年沈復東南而昭華留止京師不得隨  
病且逝從沈凡十一年年二十六生男一人女一人葬  
於城南尹村原之下作銘其詞曰

野遼刺兮衆草羅生  
颺鬱蓊兮孰先殞零  
綺顏奄忽兮辭金楹  
去何止兮歸無程  
芳藿紅荃兮昔所遲  
迎今銷亡兮不可再  
馨魂魄歸來兮復此  
園塋

表

表劉薰蘭

劉薰蘭者洛陽中女子也字媽蓀故居家時名鄭兒元和九年年十六房叔豹來求彈絃者其母以鄭兒入焉後以善笑得大悅曰更名薰蘭叔豹為人喜酒多廢薰蘭勉之曰某以孫稚蒙君曲娛之愛使得奉巾饌誠不足以及正非是然而君之齒方壯且又足給幸疴恙無有乃終日碌碌自墮如即至力旦暮將何以拔之若終不更則親戚友朋視君若某皆貽之乎於是房叔豹蹶然自咎遂取古籍詩書併學之是歲余罷隴西軍來舍房

氏始聞其語因嘉之遂為著篇以繼勸且古語有云女  
為悅己者容亦見其志也如薰蘭之能引媚其志歸於  
至理豈不知賢女之為容

題薰蘭表後

南卓昭嗣

余所善房叔豹豹好色得劉薰蘭最為嬖後即不復顧  
他色始余與房譙<sup>宴</sup>言薰必預故余得周視薰蘭所舉  
凡為言雖尚才功柔戲以樂左右而徃徃甚正余獨恨  
對薰蘭凝視之移晷刻將有嘲述卒不能云云顧余才

不足當語薰耳十年冬余友沈下賢抵豹居下賢誠才  
尤精為太史公言一見其書果能備薰善時余貢於京  
師豹與張孝標善喜言文并挑笑事因錄沈述來余知  
薰之色而待沈之才才色兩相宜也故復叙之以繫於  
沈左

沈下賢集卷十一



欽定四庫全書

沈下賢集卷十二

唐 沈亞之 撰

行狀

為漢中宿賓謨其故府君行狀

唐故銀青光祿大夫檢校戶部尚書左金吾大將軍兼  
御史大夫上柱國河南縣開國公食邑二千戶賜紫金  
魚袋贈太子少保柳公行狀

曾祖 該 皇任陵州錄事叅軍贈陵州刺史

祖 岑 皇贈祕書監

父 澤 皇太僕卿駙馬都尉贈司空

狀公諱晟其先河東人也肅宗詔取儒賢配主其父以門葉中選拜太僕卿尚和政公主主及太僕繼喪而公年始十二孝聞宮姻既去喪代宗憐之召養宮中令與皇子諸王俱受學故公得通籍中禁詔以吳大瓘為之師又以大瓘子通玄通微玄為助教令十日考學績勸所進乾元初除尚舍奉御得歸故邸又詔吳大瓘通

微通玄令就舍授學廣德中加檢校太常卿賜佩金魚  
及德宗即位以公故奉銅輦將欲加賜遷官未幾而屬  
車駕西狩矣公徒走會難奉天因泣奏曰臣願得尺詔  
持而東入都購其豪人以為効德宗竒其忠賜詔如奏  
公於是僞裝入賊軍中見賊偽將軍郭常左將軍張光  
晟公說曰陰潦之災魚鼈遊其墀壇即揚光赫明是輩  
不知枯挂之地者公等寧能從其挂哉乃示詔常等皆  
奉詔伏與誓約所歸未及期會樞籍官臣朱旣昌陰以

公之狀飛告泚遂為泚捕繫定死矣泚詰二將詞不伏即徙於外獄稍寬之有頃賊兵累敗守吏益怠公因其共繫者十餘人謀相與脫其錮髡而走之奉天德宗為之撫背流涕明日宸輿幸漢中公奉轡至南梁還拜原王府長史貞元六年改嘉王府長史歲餘翰林舍人吳通玄謫死公為疏陳雪再進不得命公之季止公曰上方怒寧可為也公不聽公章卒三貢於是德宗寤之謂公見義不回賜書寵勞竟雪通玄改澧州別駕十一年入為

少將作永貞初遷大將作加朝請大夫起崇陵功以檢校左常侍居使內作封河東縣開國子食邑五百戶又加銀青光祿大夫起豐陵功賜上柱國元和初西蜀叛發岐隴邠涇朔方太原及山東六郡之卒皆屬長武軍詔以南崇文討之既誅三蜀大困而漢中最險狹益不能賑輸所奉中朝以器用當濟遂拜工部尚書兼御史大夫持節帥漢中始詔諸征蜀卒各還故部而獨以漢中卒三千人移戍梓州其卒以為始去父母鄉里既

勞而歸及境乃不得見其閭亦以功自賴今則徙之謂  
若謫耳皆鋒奮食所引刃援弓迫中貴人時公行未及  
郡聞之遂疾驅倍走往其所先勞之苦心勞已乃問曰  
君等何以而成功乎俱曰某等伐闢耳又問闢何以而  
得伐俱曰驕不受指於天子公曰君等既知闢以不受  
指而得伐又親滅之而得功反不受指耶今即不受指  
即受滅矣於是卒皆免曹匍匐遂徙所徙歲餘入為大  
將作使匈奴先是戎相出視國使必自據偃以相辱傲

公知之乃先謂曰聞若等皆以去信為強亡禮自大禮  
信不為誠不仁也何足奉吾國乎於是單于諸王貴人  
聞之愕然失恃皆莫能詞見則改容跪伏遂致天子之  
命約信成禮而歸拜金吾右將軍始得居公爵益封千  
五百戶加為大金吾九年加戶部尚書以大金吾為左  
將軍元和十三年三月九日歿享年六十九上聞之一  
日廢聽奏詔命從官臨弔之贈賻粟帛贈太子少保公  
強辯多學諷下好問因危而致其節見義不顧其私輸

公之急其從察其門備得前行謹以所聞所見實錄於  
斯謹狀元和十四年七月十七日狀

祭文

為韓尹祭韓令公文

澤梁宋之戎郊涵雄渾於雲水陶沈毅與濃剛作眈眈  
之巨士綿將流於洪光鼓神濤之在已昔丞相之東征  
統梁城之千雉命賓余以掌檄縱枚馬之遺美見公佩  
之橫晉冠牙旗於宋壘及夷門之節卧余奉歸於故里



寧後者之無當顧狂埃以渤起司馬啖而賓徒烹血肉  
肆而為市何繼師之無作始公之功由是伏豺豹於神  
貌遂清寧乎千里聞君書於天閣帝嘉悅而忘恥嘗叙  
族以姪余謂同原於康子言康樂於一方竟綿歷乎再  
紀廩蓄粟以億計積有餘而流委握甲馬之萬銜惟君  
王之所指撲淮童與齊蠆猶烹冰以燎葦視燕趙之強  
侯若負垤之羣蟻彼承風其如何聞當飯之遺匕及柱  
天而轍日信博壯之可倚逢諒闇之初晨遂踐阼而為

治推轂兮昇壇河橋兮廊時恩光被以湛稠仍分疆以  
及嗣遵往年之來覲見差班於父子復河殒之不造遽  
相追而沒齒榮華之不邁兮倏云乎已矣悼皇情以注  
想每凝旒而撫宸錫祕物之必周余得命為臨視還壤  
屢而將篤導清笳而哀徵鑒卑志之潔恭願降歆而省  
此嗚呼哀哉尚饗

祭河南府李少尹文

維長慶四年五月十七日福建等州都團練副使沈亞

之謹遣郡吏李權奉酒肴之奠敬祭於故河南少尹李  
公之尊靈夫哲智之達塞兮繫其時之艱通故孔子厄  
而周公通管遇齊而卒業賈遭漢而不終嗚呼哀哉古  
昔何思所思惟時謨不我進綱不我維民不得濟道不  
得施雖富且貴夫何用為夫子之道歿矣今將遺誰卷  
清明之特達歸壤屢而藏之哀哉尚饗

祭胡同年文

維長慶元年十一月二十六日同年韓復張正謨龐嚴

沈亞之饌庶羞清酌之奠祭於故安定胡公之靈惟溫  
毅之龍顏兮含樸譙而苞野工時言之便詩兮闢風識  
於遠雅同遭恩於昔年蒙擢身於長者念嘉歡之平生  
君何先而捐舍痛彫華之誰疾兮聞號號之稚寡省余  
莫之不道兮促將征於前馬何決邁而無顧兮豈樂居  
乎壤屢既啟全而無尤君子美其終也哀哉尚饗

祭故室姚氏文

噫佳惠之淑敏承嚴明以信修既筭佩之有儀俟嘉人

以為仇豈位者以無當顧采贄以納予惟鄙夫之蓬塵  
牽阻離以為尤始仕筆而關塞俄自夏而涉秋誰歸來  
之須臾遂省拜於東取潔幼弱之室處奉板輿於修途  
值凝冰之沂川乃築居以捨舟念姻嫁之以時負重鈞  
於薄軀可困蹇之多淹汨歲序之忽周誤聞恙於中閨  
言迅轡於皇都及鄭洛之郊承凶言於來書悼追悲之  
莫及聲失慟以咽呼目虛疑而直想容髣髴之在眸舉  
椒桂之觴闕感百年之永乖纜總惟之撫臆非彷徨於

故居惟靈魂之昭昭省余心之勞劬

為人祭媵者文

六年春作

念昔媵者容華不常喜顏如春酣葩之芳燿乎將然曄  
乎為光翩然去步如烟洋洋萃然來居如鸞下翔佳言  
如酒和人中腸情如蠶絲繚不可央闕容莫匹惟我所  
當遂栖余床為余馨香自始於今六謝冰霜纔云就木  
言歸壠首道既已隔淹不可久嗚呼哀哉尚饗

劉巖夫哀文

秀才劉巖夫父沒不勝喪余弔而作詞以哀之其詞曰  
號呼室慙喑嗚呼兮一溢不入百體痾兮休泉竭目髮  
根枯兮脆黃催亂如霜蕪兮形若龍闕骸骨膚兮悲占  
六腑神無居兮魂魄惘惘客四隅兮去依風雲將君疎  
兮待待地之赴幽都兮生成果克李意舒兮厚姻薄養  
世有諸兮俗澁且廣無誰詠兮清魂佳字赫來圖兮鼎  
設海陸備肴俎兮吳梅狄酪浹濃腴兮逢果錯實態味  
殊兮酣若頰視若珠兮香津桂醕蟻沈浮兮綠盃既發

有罇盃兮醪醴百味君安須兮惟君之嘗恣所如兮三  
爵興洗祝延呼兮為君澆奠一饗余兮

祈雨文祠漢武帝

維長慶三年正月己巳櫟陽尉沈亞之承命於大京兆  
以歲旱用乾肉清醪恭祀於漢武皇帝神之祠下因巫  
人以達其祝語嗚呼陰陽水旱其司唯神五行六氣神  
得而均如愆且灾神何為仁惟神昔帝漢日何祥不臻  
雍熙滂洋甘露麒麟人荷其澤亦仰如春氣配高明歿



而為神居滿必誅居抑必申今者獻陽始歲亢而為屯  
草木蔽萌塞脉沈津不蒸不洩逾於十旬雨師慢傲尸  
違不賓潛深驕高枯此下人風伯囂戲歎陶濃塵潰為  
凝霾坳若頽雲鴻混突渤上蒙無垠掩蔽光明以垢春  
晨彼風伯雨師皆神所司處位不職荒投不祗神假之  
權使用之為上帝如怒其殃孰罹神明胡不督其稽察其  
欺壞法者戮後期者咎然後泰陽蒸雲雨膏以時發生  
有涯農力有施今官庶併誠虔虔於祠集於宮室鼓舞


彈吹神其聽之無敢苟期

郢州修明真齋詞

大唐太和五年歲次辛亥十月五日己卯明真大齋主  
朝請大夫守郢州刺史李詳與謫臣郡客將吏等仰首  
稽首再啟詞於虛無自然元始天尊無極大道太上老  
君羣靈衆仙咸俟畢降蕩蕩乎混元始精泮滴涵奧薰  
蒸為氣形生於聲衆動既品隨而有名清濃薄厚四氣  
之營乃岐乃陌析其混并衆動壽量道居清濃覆人為

大啟悟為明拒惡為壘護善為扃居惡如何恥燕面黥  
居善如何陽然懷聲道之所宰尊無與京伏惟皇上保  
聖億為壽程天齊尊高如天無傾某官幸職居專城雖  
喜從善樂之發怒因嫉惡而嬰每覺逾息失以度刻不寧  
是用澆氣於恬奪性於情害意之和傷和於平而神誤  
序胃血差經伏願大道神尊垂尊澤祐彫堅老榮遐衆  
之齡使淄垢磨濁迷醉醒伏願金借其堅玉助其貞今  
某等之志戴道之大德荷道之生成某等之狀蓼孽為

甘山岳為輕伏願災從日銷福與時迎某等之虔恭洗  
思滌慮以奉以行謹辭



沈下賢集卷十二